



Scotigena ab ineunte ætate operam literis dedit, & mediocrem literarum cognitionem acquisiuit. Itaq; Vuirzburgensis præsul ei liberale stipendium proposuit, atq; eum bonas literas Vuirzburgi profiteri iussit. Cum autem Henricus 5 Imperator Romam proficisci statuit, hunc Scotigenam ad se uocauit, atq; huius expeditionis comitem esse uoluit. Inter alia autem ei cõmisit, ut quicquid in ea profectioe perageretur, ipse indies cõscriberet, atque in Historiæ ordinem referret. multum enim maiores nostri interesse putabant, ut res ab ipsis fortiter & bene gestas ad posteritatem referrentur. Itaq; Scotigena tribus libris Henrici

expeditionem Latinè conscripsit, atq; quæ ipse præsens cognouerat bona fide annotauit. Vnde Cæsari & alijs principibus gratissimus extitit. claruit anno Christi 1135. Crantz. in Sax. lib. 5. cap. 31.